

THLANTE CHU



CHÂNGVAWN: “A nih leh, Pathianin a mîte hi a hnâwl ta em ni le? Hnâi lo ve. Kei ngei pawh hi Israel mi, Abrahamah thlah, Benjamina hnam ka ni sî a” (*Rome 11:1, KJV*).

Chhiar tûrte: *Rome 10, 11.*

TÛN KÂR zirlaiah hian Rome 10 leh 11 kan en ho dâwn a, chutah pawh bung 11 zâwk hi kan thlîr ngun zual bîk ang. Paula ngaihtuahna hriatthiampui thei tûr chuan hêng bung pahnihte hi a pum puia kan chhiar chhuah vek a ngâi dâwn bawk a ni.

Hêng bung pahnihte hi hmân ata tawh chai hlawh tak a lo ni thîn a; tûnah pawh a la ni reng bawk. Thil pakhat lang Chiang tak awm erawh chu, Pathianin mihringte a hmangaihzia leh mi zawng zawng hi a bo a bâng awm lova chhandam vek a châkzia hi a ni. Mi tû mah hi, eng hnam emaw, eng pâwl emawa an awm avâng ngawtin chhandamna chang lo tûra hnâwl an awm lo. Rome 10-ah hian Paula chuan Juda leh Grik mîte chu engah mah an danglam loh thu Chiang takin a sawi a (*Rome 11:12*)—an zavâiin mi sual, Isua Krista kal tlanga khawvêl hnêna Pathianin khawngaihna a pêk tawh mamawhtute vek an ni. He khawngaihna hi mi zawng zawng hnênah—eng hnam emaw, eng ram mi emaw pawh ni se, dân thiltihte avâng pawh ni miah lovin mi sual hmun tinrênga mîte Âiawha thi tawh Isua rinna avâng zâwkin a lo thleng a. Kan hna chanpual chu a inang lo a ni maithei e; mahse chhandamna ruahman bulthut hi chu a danglam ve ngai lo.

Hê thu tho hi bung 11-ah pawh a sawi chhunzawm leh a. A hmâah pawh kan sawi tawh ang khân, Paulan thlan tih leh kohna tih chungchâng a sawi rêng rêng hian chhandamna kâwkin a sawi ngâi lo va, chanchin tha hril darhna kawnga hna chanpual pêk kan nih thu zêl a sawi zâwk tih hriat tûr a ni. Tûte mah hi, a huho ang zâwnga chhandamna chang lo tûra hnâwl sa ngawt an awm lo hrim hrim a. Chuti a hnehin, Kraws-a Isua a thih hnû leh, Paula hmanga Jentail-te hnêna chanchin tha hrilh a nih ve tâk hnu phei kha chuan ringtu hmasâte khân—Juda an ni emaw, Jentail an ni emaw—khawvêl ram hrang hranga chanchin tha hril darh kha thupui berah an nei tlâng ta a ni.

Krista leh Dân

Rome 10:1–4 chhiar la. A hma lam thute kha ngaihtuah chungin, he laia a thil sawi hi eng nge ni sawi la. Engtiangin nge keini pawh hi “mahni felna” tihngheh tumtu kan lo nih ve theih tho le? _____

“Dân zawm avânga mi fel nih tumna” hi chi hrang hrangin a kalpui theih a, a lang a pauva kalpui an awm laiin, lang vak lova kalpui pawh an awm tho baw. Anmahni thil tha tih te, ei leh ina an insûmna te, Sabbath an serh thatzia te, thil tha lo an tih ve loh zawng zawng te, a nih loh leh, thil tha an lo tih tawhte thlirtute chu dân zawm avânga mi fel nih tumna thangah an âwk mêk a ni. Engtik lai mai pawh hian, keimahni sualna ni lovin Pathian thianghlimna zâwk chu kan thlir thîn tûr a ni a; chu chu Krista felna rin chhan lo va, “mahni felna” zawn tum phêtna kawnga min hruai lûttu ngaihtuahna laka keimahni kan invên theihna kawng him ber a ni baw.

Rome 10:4 hian Rome mîte hnêna Paula thuchah laimu tak chu a sawifiah a. A hmasa berin, he thu a sawina chhan hi kan hriat phawt a tûl a. Juda-te zînga tam tak khân anmahni felna tihngheh tumin (*Rome 10:3*), dân zawm avânga felna hlawh chhuah an tum thîn a (*Rome 10:5*). Mahse Messia chu lo kalin mi fel nih theihna kawng dik tak chu a rawn târ lang ta a. Felna chu Krista ringtu zawng zawngte hnênah pêk a ni a. Ani chu hmâsâng serh leh sâng dân leh hâlral thilhlân zawng zawngten an lo entîr chu a ni.

Heti laia dân a tihah hian Thu Sâwm Pêk pawh hi tel vê tho pawh lo ni mah se, Thu Sâwm Pêk hi nuai bo a ni tawh tihna chu a ni chuang lo vang. He thatna dân hian kan sual te, kan dik lohna te, kan tlin lohna te min kawhhmuh a, chutichuan Chhandamtu kan mamawhzia, ngaihdamna kan mamawhzia, felna kan mamawhzia min hriattîr a, chûng zawng zawng chu Isua-ah chauh kan hmu thei baw a ni. Chutiang chu a nih avângin Krista chu

dân “tâwpna” a ni a, dân chuan Krista leh a felna lamah mi a hruai thîn. Heti laia “tâwpna” tih hi Grik Bible-ah chuan *telos* tih a ni a, “tum” emaw, “thlen tûr” emaw ti pawha lehlin theih bawk a ni. Krista hi dânin a tum bulpui ber a ni a, chuvângin dân chu Isua hnêna min hruaitu tûr a ni.

He lai châng hi Thu Sâwm Pêk, a bîk takin (mi thenkhatin ni emaw an tih ang hian) a palî-na hi tihbân tawh a ni tihna anga lo ngaih ngawt mai chu Paula leh Thuthlung Thar bu pum pui zirtîrna kalh tlat a ni.

Mi dangte âia tha bîk riaua inhriat châng i nei ngai em? I lo tha zâwk pawh chu a ni maithei e; mahse lo tha zâwk pawh ni la eng nge a sâwna awm chuang? Krista nêh han inkhaikhin la, tichuan engtiang taka “thâ” nge i nih tih i ngaihtuah leh dâwn nia.

THAWHTANNI

DECEMBER 11

Khawngaihnaa thlan chu

Rome 11:1–7 chhiar la. He lai thu hian chiang tak maia a hnial thlâk zirtîrna tânglâwn tak chu eng nge ni?

“A nih leh Pathianin a mîte chu a hnâwl ta em ni” tih zawhna a chhâna thu hmasa zâwkah hian Paula chuan a la bâng, khawngaihnaa thlante an awm thu sawiin, chûng mîte chu Pathianin a mîte a hnâwl lohzia tichiangtu atân a hmanghâl a. Chhandamna chu, Juda an ni emaw, Jentail an ni emaw, a pawm duh apiangte tân chan theih vek a ni.

Kristian hmasâte kha an zavâiin Juda mi a ni tih hriat reng tûr a ni a—entîr nân, Pentikost Nî-a baptilisma changte pawh kha Juda vek an ni. Petera ngei pawh kha Jentail-ten Krista khawngaihna an chang ve thei tho va, chuvâng chuan an hnênah chanchin tha hrilh a tûl a ni tih a pawm theih nân inlârna leh thilmak hmuhtîr ngai hial a nih kha (*Tirh. 10; 15:7–9*).

Rome 11:7–10 chhiar la. Paula hian Israel mîte zînga Isua hnâwltute kha chhandamna chang thei lo tûrin Pathianin an mit a tihdelsak a tihna a ni em? _____

Rome 11:8–10-ah hian Paula chuan Juda-te Pathian Thu nia an pawm Thuthlung Hlui thu ðenkhat a sawi chhâwng a. Chû thu chuan Israel mîte chu Pathianin thil an hmuh loh a, thil an hriat theih lohna tûrin mutthlûkna thlarau a chantîr thû a sawi a. Chhandamnaa hruai lût tûr êng chu an hmuh theih lohna tûrin Pathianin an mit a tihdelsak a maw? Tihdelsak lo vê! He lai thu hi Rome 9 kan hrilhfiahna êng aţang khân hriatthiam tum tûr a ni a. Paula hian mi mal chhandamna chungchâng a sawi lo va, a chhan pawh Pathian chuan mi tû mah hi a hnam ang zâwngin a hnâwl tlat lo a lâwm. Heti laia a sawi hi chu mîten a hna chanpual an neih vê chungchâng zâwk a ni.

Eng hnam emaw hi chu chhandamna chang ve thei lo tûrin Pathianin a hnâwl sâ nia ngaih tlatna hi eng nge ni a dik lohna awm? Eng vângin nge chutiang ngaihdân chu chanchin tha laimu, Krista chu mi zawng zawng tân a thi a ni tih nêh hian a inkalh? Engtiangin nge chutiang ngaihdân chuan Juda-te chungchângah pawh nghawng râpthlâk tak a neih le?

THAWHLEHNI

DECEMBER 12

A zâr pui ber chu

Rome 11:11–15 chhiar la. He laiah hian eng beiseina ropui tak nge a sawi? _____

He lai chângah hian ðawngkam inzûl tak pahnih kan hmu a, chûngte chu: 1) “an [Israel-te] famkimna” tih (*Rome 11:12*) leh 2) anmahni [Israel mîte] pawm lehna” tih (*Rome 11:15*) te a ni. Paula hian Israel mîte paihthlâk leh hnâwl an nihna chu hun eng emaw ti chhûng atân chauh niin, nakinah an famkimna leh pawm an nih lehnaten a rawn zui leh tho dâwn tih a lo hmu lâwk vek a. Hei hi

hemi bung tîr lama zawnhna awm, “Pathianin a mîte a hnâwl ta em ni?” tih Paula chhâna pahnihna a ni a. Hnâwl ta nia a lang hi chu eng emaw ti chhông atân chauh niin a sawi.

Rome 11:16–24 chhiar la. Heta hian eng thu nge Paulan a sawi le?

Israel mi zînga la rinawm chhun tlêm tê-te chu olive thing, a zâr ðhenkhat tliak ta (chu chu Isua Krista ring lotute sawina a ni) nên a tekhin a. Hê thû hi Pathianin a mîte a la hnâwl lohzia tilangtu atân a hmang a (*Rome 11:2*). A zung leh a kûng pui chu a la ding reng niin a sawi.

Isua hnâwltute chungha thil thleng ang kha Jentail ringtute chungah pawh a la thleng ve leh thei tho va. Bible hian “vawi khat chhandam tawh chu chatuan atân chhandam an ni tawh” tih angin min zirtîr lo. Chhandamna chu a thlâwna pêk kan ni ang chiah hian, kan duh phawt chuan kan hnâwl thei tho bawk a ni. Suala kan tlûk luh châng apiang hian chhandamna huang pâwnah kan awm nghâl a, ðha famkim kan nih loh chuan chhandam kan ni lo ang tih ang ngaihdân hi nei lo tûra kan fimkhur hlê a ðul rualin, a lehlamah, Pathian khawngaihna chuan min khuh zo khawp a, keini thil tih leh duhthlanna siam vête hi chuan kan chhandamna hi min lâk bosak thei lo hrim hrim tih ang ngaihdân pawh kan nei chuang tûr a ni lo. A tâwpah chuan, “ðatnaa awm rengte” (*Rome 11:22*) chauh chhandam an ni dâwn sî a.

Ringtute chuan anmahni felna leh ðatna a chhuang tûr a ni lo va, a mihringpuite âia chungnung zâwkah pawh a inngai tûr a ni hek lo. Chhandamna chu a thawha thawh chhuah tûr a ni lo va; thilthlâwnpêk a ni zâwk. Kraws hmâah, Pathian thianghlimna tehfung hmâah chuan kan zavâiin intluk tlâng vek kan ni a; Pathian khawngaihna mamawhtu mi sual, khawngaihna avâng chauha chan theih thianghlimna mamawhtu kan ni ðeuh a ni. Keimahni-ah hian han chhuan tlâk thil pakhat mah kan nei lo va; kan chhuan tûr awm chhun chu Isua leh he khawvêla tîsa pû-a lo kal a, kan hrehawm tawrh âi tuar a, kan sual avânga thî a, kan nun dân tûr

min kawhbmuh a, chutianga nun thei tûra thiltihtheihna pêk min tiamte chauh hi a ni. Hêng zawng zawngahte hian amahah chuan kan inngat pumhlûm tawp a, ani tel lo chuan he khawvêlin min pêk theih thil lo chu eng mah beisei kan nei lo vang.

NILAINÎ

DECEMBER 13

Israel mi zawng zawng chhandamin an awm ang

Rome 11:25–27 chhiar la. Thil ropui tak lo thleng tûr a sawi chu eng nge ni? _____

Rome 11:25–27 thu awmzia hi eng nge ni ang tiin Kristiante chu an lo inhnial tawh thîn a, tûn thleng pawh hian pawm dân thuhmun a la awm hlei thei chuang lo. Thil Chiang êm êm erawh a awm nual a. A hmasa berin, hê thû hi Pathianin chhandama awm tûra Juda-te a sâwm thu a ni tih kan hre phawt tûr a ni a. Paula thil sawi hi chu a bung tîr lama “Pathianin a mîte a hnâwl ta em ni?” tih zawhna chhâna a ni a. A chhâna chu “Hnai lo ve!” tih a ni kha. A hnâwl lohzia heti hian a sawifah nghâl bawk a: 1) an mitdelna (Grik ãawngin *porosis* tih a ni a, “chawlawlna” ti pawha lehlin theih a ni) chu thil “thênkhatah” chauh a ni a; tin, 2) hun eng emaw ti chhûng atân niin, “Jentail-te famkimna a lo thlen hmâ atân” chauh a ni bawk.

“Jentail-te famkimna” tih chu eng nge ni a awmzia? Mi tam tak chuan he ãawngkam hi khawvêl pum puiin an hriat theih nâna chanchin ãa thupêk famkim sawi chhuahna niin an ngâi a. “Jentail-te famkimna” chu chanchin ãa hrlina hmun apiangah a lo thleng zêl a ni an ti. Israel-te rinna, Kristaa puan chhuaha awm chu mi zawng zawng tâna tlângzarh a ni tawh a. Chanchin ãa chu khawvêl ram hmun tinah hrlh a ni tawh bawk. Krista lo kal leh hun chu a hnâi tawh hlê a. Chutiang chu a nih avângin tûnah hian Juda-te zînga tam tak chuan Isua an rawn pan ve ãan ta mêk a ni.

Thil hriatthiam harsa tak dang leh chu “Israel mi zawng zawng chhandamin an awm ang” (*Rome 11:26*) tih thu hi a ni a. He ãawngkam hi Pathian thupêk avângin Juda zawng zawngten

chhandamna an la chang vek dâwn a ni tihna angah ngaih tûr a ni lo. Bible khawi laiah mah hian mi zawng zawng emaw, hnam pum emaw chhandam vek an nih tûr thu kan hmu lo va. Paula ngei pawh hian “an zînga thenkhat” chauh chhandam theih a inbeisei a (*Rome 11:14*). Hnam dangte ang thovin Juda-te zîngah pawh Messia pawm an awm a, chutih laiin pawm lo eng emaw zât an awm vê tho bawk a ni.

Rome 11 thu hi hrilhfiahin Ellen G. White-i chuan chanchin tha puan darhna hmâwrbâwk a nih hun tûr chu a sawi a, chutih hunah chuan Juda-te zînga tam tak chuan Krista chu an Tlantu a ni tih rinnain an la pawm dâwn a ni a ti.—*Tirhkohte Thiltih*, (2nd Edition, 2014), p. 341.

“Khawvêlah hian hna ropui tak thawh tûr a awm a. LALPA chuan Jentail-te chu hruai khâwm an la nih tûr thu a puang a; mahse Jentail-te chauh ni lovin, Juda-te pawh hruai khâwm a ni ve tho vang. Juda-te zîngah hian lo la piangthar tûr mi tam tak an awm a, chûng mîte zârah chuan Pathian chhandamna chu khâwnvâr alh tha ênna hnuai kal angin kan la hmu dâwn a ni. Ram tinah Juda mi an awm a, anni hnênah hian tûnlai thu dik êng hi thlentûr ngei tûr a ni. An zînga tam tak chu êng lamah an lo kal ang a, thiltihtheihna ropui tak nêh Pathian dân hi tihdanglam theih loh a nihzia an la puang dâwn a ni.”—*Evangelism*, p. 578.

Kristiante thurin tam tak hi Juda sâkhuaa zung kaih a ni hlawm tih hria la. Engtiangin nge Juda sâkhaw kalphung thenkhatte zirna hian Kristian thurin hrethiam thei tûrin a puih che?_____

NINGÂNĪ

DECEMBER 14

Mi sualte chhandamna chu

Paulan a chipuite a hmangaihzia chu Rome 11:25–27-ah hian Chiang takin a lang a. A chipuite ngei zînga mi thenkhatin amah leh chanchin tha thu tak an do tlat mai kha hriatthiam a harsa ngawtin

a rinawm. Mahse chutiang kârah pawh chuan mi tam takin Isua chu Messia a ni tih an la hriat ngei a ring fan tho a ni.

Rome 11:28–36 chhiar la. Engtiangin nge Paula hian Pathian chuan Juda-te chauh ni lovin, mi zawng zawng a hmangaih vek a ni tih lantîr? Engtin nge Pathian khawngaihna thiltihtheihna mak leh ropuizia chu a târ lan? _____

Rome 11:28–36 aţang hian, Juda-te leh Jentail-te dinhmun inan lohna chu sawi tho mah se, thil lang Chiang tak pakhat a awm a, chu chu: Pathian khawngaihna leh hmangaihna leh zahngaihna chu mi sualte chungah leih buak a ni tih hi a ni. Leilung pian hmâ daih aţang tawhin Pathian chuan mihringte chhandamna atân ruahmanna a lo siam a, mihringte leh hnamte chu ama duh dân tihputlin a nih theihna hmanrua atâna hman a lo tum daih tawh bawk a ni.

Tawngţaina nê, uluk takin Rome 11:31 thu hi chhiar la. Juda-te hnênah chauh pawh ni lovin, mi zawng zawng hnêna thuhretu tîr kan nihna kawngah hê thû aţang hian eng zirlai pawimawh tak nge lâk chhuak theih kan neih le? _____

Kum za tam tak ral ta kha thlîr kîr ila, Kristian kohhran hian Juda-te hi kha âi khân ngaihsakin ti ţha deuh ni se chuan, tûn âia tam zâwk daih hian an Messia hi an pawm vê ngei ang tih a Chiang a. Krista thih hnu lawka mi tam takin rinna an tlûksan ta mai leh, mi lem biakna sâkhuain Kristianna a luhkhung nasa lutuk (ni sarihnî Sabbath âia Sunday serh zâwk hlauhna ang chi te) khân Isua pawm ve mai duh Juda tam tak chu a hnawt ţiau zo a ni tih a Chiang khawp mai.

Chuti a nih chuan, Kristian zawng zawngte hian Isuaa zahngaihna pêk a nih hi hre reengin, mi dangte hnênah pawh zahngaihna an lantîr ve a va ţul tak êm! Kan lantîr lo a nih chuan Kristian kan ni thei lo ang (*Mat. 18:23–35 en la*).

Mi tu emaw (phû miah lo pawh a ni maithei), a chungah khawngaihna i lantîr tlat a awm em? Eng vângin nge chu mi chungah chuan harsa viau mah se, i lantîr ngei a tûl sî? Chutiang chu Isuan kan tâna a tih kha a ni lo'm ni? _____

ZIRTÂWPŊÍ

DECEMBER 15

Zir belhna: Ellen G. White-i lehkhabu, *Tirhkohte Thiltih*, phêk 68–76-a, “Thubuai Rêlna Sâng Ber (Sanhedrin) Hmâah” tih te; phêk 100–109-a, “Tiduhdahtu Zirtirtu Lo Ni Ta Chu” tih te; phêk 418–432-a, “Rome Khua Aţanga Ziah” tihte chhiar la.

“Israel-te chu a hnam angin tling zo tawh lo mah se, an zingah khân a la bâng eng emaw zât an awm tho va, chûng mîte chu chhandam tûr an ni. Chhandamtu lo kal lai khân mi rinawm tak tak, Baptistu Johana thuhri lăwm taka lo dawngsawngtu eng emaw zât an awm a, chûng mîte chu Messia chungchânga hrilhlăwkna thûte zir thar leh tûra kaihhruai an ni a. Kristian kohhran hmasa din a nih pawh khân, member tam tak chu hêng Juda rinawm, Nazareth Isua chu a lo kal hun an lo nghahhlelh êm êma kha a ni tih hretute an ni hlawm nghê nghê.”—Ellen G. White, *Tirhkohte Thiltih*, p. 337.

“Juda-te zingah hian, Tarsa khaw chhuak Saula ang bawka Pathian Lehkha Thu hre êm êm mi thenkhat an awm a, hêng mîte hian thiltihtheihna mak tak nê Pathian dân danglam theih lohzia an puang ang. . . . Hun rei tak chhûng thlahthlama awm tawhte leh mîte hmuhsita awmte tâna a chhiahhlawhten rinawm taka hna an thawh avângin a chhandamna chu puan chhuahin a la awm dăwn a ni.”—p. 341.

“Chanchin ţa puan darhna hna thawh zawh dăwn hnaih lam, mi bîk tûte emaw thawh atâna dah, mahse ngaihthaha awm rih tlat sî hi thawh a tûl lai hian Pathian chuan khawvêl ram hrang hranga Juda awmte chu ngaihsak zual bîk deuh tûrin a thuchah puangtute chu a phût a ni. Thuthlung Hlui thûte leh Thuthlang Thar thûte hi Jehova chatuan thiltum hrilhfiahna kawngah a inrem thlap mai a, hei hi Juda tam tak tân chuan thlarau lama harthar lehna, thil siam thar kăwl lo ên ţanna a ni ang. Chanchin ţa buten an sawi Krista chu

Thuthlung Hlui lehkhabu hrang hrang hrangah târ lan a ni tih tih hria a, Thuthlung Thar lehkhabutén Thuthlung Hlui zâwlneite hrilhlâwkna chu chiang takin an hrilhfiah a ni tih an hmuh hunah chuan an hriatna muthlû-te chu kaihtawh a ni ang a, Krista chu khawvêl Chhandamtu a ni tih an lo hre ve tawh ang. An zînga tam tak chuan rinnain Krista chu an Tlantu-ah an pawm dâwn a ni.”-p. 252.

Sawi ho tûrte:

- ❶ Pathian dân, a bîk takin Sabbath serh tûr a ni tih hi, ni hnahnûngah chuan enghelh ber tûr a nih avângin, Juda-te hian—an zînga tam tak hi chu Adventist-te ang bawka Thu Sâwm Pêk châwisângtu vê tho an ni sî a—khawvêl hmâah eng eng emaw sawi fel hna thawh tûr an nei ve ngei ang tih hi rinhlel h rual loh a ni lo’ m ni? Sabbath serh thû-ah phei chuan Adventist-te hi Juda-te hnung zui vê mai kan nihna chin a awm sî a. Han sawi ho teh u.
- ❷ Kohhran pâwl hrang hrangte zîngah hian eng vângin nge Adventist Kohhran hi Juda-te zînga rawngbâwl na nei hlawhtling thei ber tûr kan nih le? Nangmah leh i lawina kohhran khân in khua/vênga Juda sâkhaw vuante hnênah eng ang rawngbâwl na nge in neih theih awm?
- ❸ Hmânlai Israel-ten an lo tih sual tawhte aţang khân eng nge zir chhuah theih kan neih sawi ula. An tih sual ang kha keini chuan kan tih ve lohna tûrin engtin nge kan invên theih ang?

INSIDE STORY

CIGARETTES AţANGIN HMUN HIMAH, Then 3

IZAWNNA lamah te, chhûngkua leh fanau enkawl kawngahte Harsatna ka tawh dâwn apiangin, Pathianin rinna kâilâwn tîr lam kha min hriat nawntîrin, ţawngţaia Amah rinchhan tûrin min ti leh thîn.

Tûnah chuan eizawna atân sumdâwnna chhe tê ka nei vê a. Naupang inawmlemna (toys) ka zuâr a, Vinnitsa khawpui park hmun hrang hrangah kulh nghet tak ka nei ta a ni. Min rawn

dâwrtu apiangte hnênah Adventist magazine, hrisêlna leh thlarau nun lama thu bengvâr thlâk tak chuânna chu ka lo pe zêl thîn a.

Mi tam zâwkte tâna park-a lên lâm hun pawimawh ber chu Sabbath nî leh Sunday hi a ni thîn a. Central city park hi khawpui thuneitûte kutah a awm a, ka sum lâk luh a thât poh leh an chan vê tûr hi a tam ting a ni mai a. Mahse chona lian tak awm chu Sabbath nî kan serh tlat hi a ni. Chumi chungchângah chuan ka thawh tîr lam khân harsatna tlêm kan nei a. Sabbath nîa chuta awm tûra min nawr luih an tum a, mahse ka dîng nghet vê tlat sî a, Sabbath nîa ka thawh dâwn âi chuan ka thawk lo lâw lâw mai dâwn sî a ni. Ka thûah ka dîng nghet tih an hriat a, ka hnâ ka thawk thâ tih an hriat bawk sî avângin, mi puitling, nun tuâng hruî nei tiin mi an fak ta phian zâwk a ni.

Eng emaw chângin, ka nû kan phûmna thlân mual ka tlawh leh zauh thîn a, Thlân lung ka'n chhiar chuan, ka thian kawm thinte lungphunte pawh ka hmû a, rilrû a na duh khawp mai. Pathumte phei kha chu inkhâwm atâna ka sâwm thinte an ni a, tûnah chuan thlân lungah an hmingte a chuâng ta mai sî a ni.

Ina kan hâwn tum khat chu, ka nupui hnênah ka nun hlui râpthlâkzia an hmuhtîr a. Kan lên vah vêlnaah ka thian la damte pawh kan hmu bawk a, an thû thei ngawr ngawr a ni ber mai. Ka thian pakhatin min hmuh chuan ka lam panin a lo lân a, ka hmâah thingthîin, “Ka nun hi ka ning tawh lutuk!” tiin a inhnîp hlawp hlawp a.

A hnênah chuan, “Helai hmunah ngêi hian kan thianpa thlâna min awm san ta kha inkhâwmpuiah ka sâwm a, mahse a bengkhawn duh sî lo. Tûnah kei pawh hian chutiang chhiatna bawk chu ka tâwk dâwn ta a ni,” a ti a.

Kei chuan, “Thlâna kal âi chuan biak ina kal chu a awlsam zâwk daih a sîn. Min han en teh, hei ka nupui leh fanûte an nih hi,” tiin ka thlamuân a.

Ani chuan a'n en kual dan dan a. Kei chuan, “Nang pawhin nun bul i thar thar thei a nia,” tiin ka fuih a. Mahse a thianté lam chu min hawisan a, an zu in chu an chhonzawm ta zâwk a. Chhûngte belh tûr pawh a nei lo va, neih eng mah a nei lo. Nî tin mai hian zu ruîh tûr chiah an zawng reng mai a ni.

Kan kal tâk hnû chuan ka nupui chuan, “In nun hlui awm dân tûr chu ka manthiam mai,” a ti a. Kei chuan, “Ni e, kei pheï chu a hleihluak ber maw lê,” tiin ka ti a.